

黃山圖經書後



黃山圖經一卷圖三層四篇上列三十六
峯中岩洞僧舍下寫寺祠村落經三十六
則詳著峯巒高大形勢事跡水源流歸宿
一篇其文簡古明晰無冗累誠異人傑作
尾署祥符祠刊版廢久審圖所載如新興
寺萬石市五福堂藍若寺新林寺花山寺
黃濟祠折足橋皆列下方而祥符稱祠何



也且山麓湯口未載豈程氏繇元及明始
來遷居著作于前未之及爾余採藥虞山
得此于藏書家實宋鏤本上有姑蘇吳岫
家珍印記世所希有旋覽之下且喜且愕
數尋文獻足徵竊怪創志者未見圖經不
全載卷首致古人書湮失無傳且峯巒高
大溪水源流使後來牴牾聚訟何哉浮丘
告帝按周書異記神仙傳云然新志不能

發揮其所以然者不能為山靈重天寶中
樵翁見石棋布列撥去後再至復再見其
為仙客引人入道未可知余竊笑前此創
志未得見不錄卷首徒濫收後來詩句何
其不愛古人耶此經宋無名氏著案所載
開元天寶大中年事或者唐人書而宋人
成之也香沙道人方望子記

黃山圖舊本四張上載三十六峯中下
飛龍峯下有新興寺又下有龍吟石
石門峯狼豹洞又左之下萬石市
雲門峯下有焦村

翠微寺下有廣寺

翠微洞下有五福堂

藍若寺

仙都峯下有福寺

望仙峯下有薌林寺

九龍洞 藏雲洞

芙蓉峯下有花山寺

朱砂石有湯池 符祥亦在下

浮邱祠之下有黃濟祠 有折足橋

舊本黃山小景祥符祠刊

黃山圖經



宋無名氏著

黃山舊名黟山當宣歙二郡界在歙之西北高一千一百七十丈東南屬歙縣界西南屬休寧縣各一百二十里即軒轅黃帝棲真之地唐天寶六年六月十七日勅改為黃山按江南諸山之最大者有天目天台二山郡國志云天目山高一萬八千丈而

低于黃山者何也以天目近連浙江天台
俯瞰滄海地勢傾下百川所歸而宣歙二
州即江之上游海之濫觴也今計宣歙之
平地已與二山齊焉况此山有摩天曷日
之高則浙東西宣歙池饒江信等郡之山
竝是此山肢脉諸峯積石迫如削成煙嵐
無際雷雨在下霞城洞室乳竇瀑布無峯
不有巖巒之上竒蹤異狀不可摸寫誠神

仙之窟宅也山上往往間峯上仙樂之聲
自郡至山口一百二十里自山口至湯院
又八里磴道崎嶇頗通車馬按周書異記
神仙傳云昔軒轅黃帝問道于廣成子受
胎息于容成子吐納而谷神不死獲靈丹
于浮丘翁遂思超溟渤游蓬萊乃告浮丘
公曰願摠衣躬侍脩煉浮丘公曰擇賢而
師學必精奧棲隱勝地業則易成煉金為

丹必假于山水山秀水正其藥乃靈江南
黥山據得其中雲凝碧漢氣冠羣山神仙
止馬地無葷辛境絕腥腐古木靈藥三冬
不凋名花異果四季皆有山高木茂可為
炭以成藥迸泉直瀉狀如飛布下有靈泉
香美清溫冬夏無變若能齋心潔已沐浴
其中飲之灌腸萬病皆愈矣黃帝遂命駕
輿容成子浮丘公同游此山山有三十六

峯三十六源二十四溪十二洞八巖

第一煉丹峯浮丘公于此山頂上煉丹經
八甲子丹成黃帝即服七粒不籍雲靄昇
空遊戲故其上有煉丹竈下有煉丹源源
中有煉丹水下有洗藥溪搥藥石曰儼然
常存

第二天都峯高九百仞與煉丹峯相並如
天中羣仙之所都峯下有香谷源長閭異

香馥郁又有香泉溪泉水中常香美也

第三青鸞峯如青鸞之蹲顧連天都峯高
八百二十仞下有採藥源黃帝曾于此處
採藥也

第四紫石峯純是紫石連青鸞峯高六百
仞下有湯泉溪歙州圖經云黟山東峯下
香泉溪中有湯泉二口如椀大出于石澗
熱可煮石仙經云山石出硫磺朱砂其水

即熱此殆朱砂乎春時即紅氣味香美周
書異記云黃帝受浮丘公還丹再服四十
二粒毛髮之類鬣潤過常視其肌膚悉皆
皴折浮丘公命黃帝至湯泉浸七日皴折
故皮隨水而去斯須湯池中有黃龍現雲
霧翳空上有笙歌之聲逡巡霧氣開散青
天亮皎正當日晝香氣氤氳隨風襲人黃
帝浮丘公容成子同見一珠函一玉壺浮

坵公啟之函中有霞衣寶冠珠履壺中有瓊漿甘露浮坵公曰此是上天降下以奉

黃帝遂授于帝帝乃受之持歸石室

此下事具

望仙

峯下浮坵公遂于南峯題石壁記以示後

世尋至唐大歷中歙州刺史薛邕遣人就立舍宇大設盆斛病無輕重入者皆愈又至大中五年刺史李敬方患風疾遂至湯池浸浴六年十一月又入浴因感白龍見

風疾遂瘥乃造白龍堂並勒銘以記其銘

曰

黟山南垠湯水沸騰伏陽韜焰陰火潛蒸盛夏不增窮冬不冰其誰主張唯龍是膺刺郡二年病不能興發汗五日信而有徵乃作龍堂于湯西陵乃刻龍像作神依憑非衆非公非巫非僧王徭步將陳顛歛巫迭掌吾事各勤爾能未盡瞻依去懷憂競

苟肆慢心貽神惡憎盲瞶瘡癩災爾相仍
壬申既夏一陰始昇鑄石室壁庶無騫崩
遂號湯院請僧住持焉保大二年元宗皇
帝勅為靈泉院宋朝賜名祥符

第五鉢孟峯覆鉢之狀連鍊丹峯高八百
五十仞下有新羅庵基址猶存神仙補闕
傳云昔劉宋時有一東國僧人不知姓名
于此修禪定學道術一生休絕三十餘年

不出溪口况山下乎于峯脚平上石以錫
杖卓出一泉鍊丹而服偶一日彩雲仙樂
來迎忽乘龍飄然上昇又有一洞深邃多
蛇蟲人不敢入其僧鍊丹之處梁大同中
有一樵叟入見一婦鼎石竈藤蘿纏鎖猶
在因名仙僧洞洞口陰暗之夜有一燈現
宛如星明人謂之聖燈又有擲鉢源其僧
常擲鉢于空中久而始下其錫杖泉至今

存焉

第六桃花峯連鉢盂峯高八百仞下有桃花源溪桃花溪即黃帝親種桃花至今徧峯源溪洞中純是桃花三月方盛開每謝之時滿溪水紅流入湯泉溪春即名桃花湯第七朱砂峯宛如削成高九百仞峯半壁有朱砂巖岩中有朱砂望之如欲崩頽猿猴亦不能到惟飛鳥方及神仙補闕傳云

浮邱公黃帝同取此朱砂煉丹故天下獨貴人莫能獲下有硃砂洞朱砂巖朱砂溪溪口水向東流入湯泉溪

第八獅子峯連朱砂峯西南高五百仞宛如獅子蹲踞下有錦霞洞常有錦霞生又有香林源林中常有異香馥郁

第九蓮花峯連朱砂峯北高九百仞如蓮花正開下有蓮花洞蓮花源水流入朱砂

溪與桃花溪水合流

第十石人峯在蓮花峯北高七百仞宛如人形下有白鹿源曾有白鹿出為人所獵而貢之又有駕鶴洞浮邱公在此駕鶴也第十一雲際峯在石人峯西南高八百八十仞峯頂入雲際下有藏雲洞長藏白雲又有乳水源味如乳下有布下水落白雲溪溪中長生白雲水向東流入桃花溪

第十二疊障峯連雲際峯西高八百仞峯形如障下有石乳岩嵒中長滴石乳其白如雪四季不絕今俗只呼滴水岩又有陰坑源長陰不見日源水東流入白雲溪溪中有一潭如盆下又有一大潭黃帝曾向此取水煉丹感白龍見名曰白龍潭水入朱砂溪

第十三浮邱峯連疊障峯西南陰矧源南

高九百仞圖經云頂有浮邱公仙壇彩霞
靈禽棲止其上即浮邱公游息之所下有
浮邱廟浮邱觀唐會昌中毀折今有廟存
焉每年州縣祈禱立應峯下有五雲源浮
邱公曾于此源中乘五色雲去又有浮邱
溪今俗呼為浮溪水東南流入曹公溪昔
有人姓曹于此溪頭上昇今俗呼只為曹
溪又有人至浮邱壇所忽見樓臺宛然樓

前有白蓮池左右有鹽積米積遂歸山下
邀人上山去取了不知其去處也

第十四容成峯連浮邱峯東高九百仞容
成子常游息于此故有容成溪今俗呼為
容成峯下有紫烟源長有紫烟籠蓋又有
容成洞源中有容成子故居基址存焉

第十五軒轅峯連容成峯東高八百九十
仞下有紫芝源周書異記云軒轅黃帝曾

于此源採紫芝今長有紫芝生峯頂有仙
石座即黃帝坐處下有仙人洞紫雲溪長
生紫雲不散下有石仙室即黃帝游息之
所曾有樵翁入室中見一道士釀酒道士
見樵翁設一盃樵翁云天性不飲至夜又
彈琴說之樵翁坐睡道士曰汝此宿不得
送出洞口忽到朱砂溪便迷入朱砂洞香
林源出不得遂變成毛人今有毛人岩其

室中石鼎石砧剉藥刀痕猶存即黃帝遺
跡焉

第十六仙人峯連軒轅峯東北高八百六
十仞頂有二石人宛如刻成相對而坐仙
記注云浮邱公與黃帝經游此處上昇之
後雙石筍化為峯可高十丈信神仙之聖
跡俗謂南向者為軒轅黃帝背倚一石屏
迥如玉宸北向者為浮邱公其下石壁高

五百餘仞猿猴亦不能到翫者上紫石峯望之宛如二仙人對坐下有仙人洞因此名焉

第十七上昇峯連仙人峯西高八百仞黃有人姓阮于此峯頂上昇今有阮公源阮公岩阮公溪俗呼為阮溪山下往往日夜聞峯上仙樂之聲

第十八青潭峯連疊障峯北高八百仞下

有一大青潭流水傾下可高百餘仞有布水源錦魚溪此溪有錦鱗魚也

第十九翠微峯連青潭峯北高八百五十仞下有翠微源翠微洞又有翠微寺青牛溪黃有樵人于此見一青牛遂前捉之走入水中尋覓不見峯畔有布水傾下此峯屬宣州太平縣界

第二十仙都峯連翠微峯東高八百仞下

有仙都源仙都都院神仙補闕傳云黟山
北峯是神仙所游之處此峯亦係宣州太
平縣界

第二十一望仙峯在山北連仙都峯東高
八百五十仞周書異記云黃帝容成子浮
邱公于此湯池同見一珠函玉壺持歸中
峯下石室中飲壺中甘露瓊漿披函中霞
衣簪寶冠珠履光輝山谷須臾黃帝乘飛

龍前引綵幢珠蓋三仙飄然從峯頂上昇
羣臣攀龍鬚墮地故有龍鬚岩至今長生
龍鬚草下有望仙鄉此處有人望見空中
三仙上昇聞綵雲有弦歌之聲今峯西有
弦歌鄉弦歌洞弦歌溪屬州宣州太平縣
第二十二九龍峯連望仙峯東南高八百
仞九朶合成如九龍相纏下有九龍岩九
龍源九龍洞九龍溪九龍觀觀今改為僧

院天尊見存焉

第二十三聖泉峯在九龍峯西南桃花峯
東北宛如削成上下大中央小狀如腰鼓
高八百七十仞頂上頂有一湯池人不能
到于鄰峯頂上望見池中波浪騰沸從地
中湧出一布水向峯頂東南而下入湯泉
源甘泉源甘泉溪周書異記云浮邱公謂
黃帝曰黥山中峯之頂上有湯池水味甘

美可以煉丹煮石蓋此處

第二十四石門峯即黥山之中峯高八百
八十仞下有石門兩山相通山之半壁有
一大石橫架其上通兩山焉兩畔相對各
有一大石床如龜形長數丈通人行當中
有大石塔正圓如月有四層址圓二丈高
三丈已上上大下小狀如刻成然非人力
能及蓋靈仙所建也半壁有一石澡瓶引

觜狀如杓柄觜中有孔孔中有飛泉出焉
山下有毛人昔唐大歷中至山下為人所
殺明日其妻至知夫已亡號咷哭之而去
峯下有一石門源石門溪猿猴岩狼豹洞
曾有狼豹入岩洞止焉

第二十五碁石峯在石門峯畔高八百仞
浮邱公與黃帝圍碁之所也唐天寶中曾
有樵翁到見一石碁局布子分明遂撥開

取之却回見復如故後人尋之輒迷去處
下有碁石源

第二十六石柱峯如柱之削成高七百九
十仞在碁石峯西北下有石壁故號石壁
源

第二十七雲門峯在石柱峯南高八百八
十仞兩峯相並如門時時有雲從門中過
下有雲門源雲門溪溪水從二峯中流下

向東南而去

第二十八布水峯在雲門峯西高七百八十仞下有百藥源源中生百藥下有紅泉溪溪水紅色布水長十餘丈

第二十九石床峯在布水峯東北高八百五十仞頂上有石床長一丈二尺濶五尺如白玉琢成即容成子浮丘公黃帝游息之所中有碧椀三枚紫石床三張下有石

室源十餘丈如屋

第三十丹霞峯在石床峯西南高八百九十仞時時有丹霞籠之有紅朮源徧源生紅朮有流霞溪時有流霞隨水而出

第三十一雲外峯在丹霞峯西北高九百仞勢出雲外下有杏桃源源中有杏花樹千百株峯頂上有杜鵑花遍峯純是杜鵑花樹下有飛泉溪有瀑布泉飛下十數丈

也

第三十二松林峯在雲外峯西高七百仞下有松林溪徧峯皆是松林又有黃連源石榴岩岩上有石榴樹

第三十三有紫雲峯在松林峯西北高八百九十仞頂上常有紫雲蓋之下有柏木源徧源盡是柏木有榆花溪水流入湯泉溪口合流也

第三十四芙蓉峯在松林峯西高七百五十五⁺仞下有白馬源即黃帝遊行之地隔溪南面有馬跡石石上有馬跡三十餘箇深者可一尺淺者可二三寸宛如泥中所印之跡此是黃帝遺踪明矣

第三十五飛龍峯連芙蓉峯高八百七十七丈

第三十六采石峯連飛龍峯西高六百仞

下有白龍源俱是白石其石如玉陰暗之夜即見布水流下

右此三十六峯並是從脊以上折算高低山海經云八尺曰仞此外諸峯高二三百仞者並巖洞溪源數千百不啻圖經傳紀不書者此皆不載又有一石橋唐開元中曾有一樵人在鍊丹峯北見之跨二石峯長三二十丈近代又有樵人見在蓮花峯

下南復有前說有人尋之竟不知去處復有採山人于石橋下宿半夜聞笙歌從石橋上過至天明亦不見仍迷舊路之所其山南面及東南面水流入休寧歙縣等界又大北面水流入宣州太平縣界外小肢入宣州界者不能具載大山南面肢脉極多其經口口州界散入浙東西又江西諸郡者唯有兩肢東口口箬嶺南面水流入

宣州口口口界次東至黃檗山南面水流
入當州界北一口口宣州太平縣界次入
績溪縣界至新嶺東口口流入績溪縣界
東北面北水流入宣州口口縣界東至籠
岩山南面水流入績溪縣界北面口口入
宣州旌德縣界東肢出績溪山西面水流
入口口縣界北面水流入宣州寧國縣界
南面水流入杭州唐山縣今昌化縣是也

迤邐一肢東入杭州唐山縣散入浙西諸
郡由天目而止杭州吳山其績溪山又東
南起一肢至昱嶺入歙縣界西南流入歙
縣界東面水流入杭州唐山縣界又南山
大抵溪西北面水流入歙縣界東南面水
流入睦州青溪縣今建德路淳安縣是也
西肢入黟縣界至牛泉嶺南面水流入黟
縣界北面水流入宣州太平縣界又南轉

入武亭嶺東面水流入黟縣界西面水流
入祈門縣界又南出婺源縣界至浙嶺南
面水流入婺源縣界北面水流入休寧縣界
又西南次至斜山南面水流入婺源縣界
北面水流入休寧縣界又南至大鱗山西
北面水流入婺源縣界南面水流入衢州
常山縣界迤邐南出衢州常山縣散入浙
東諸郡其山東西各起一肢西肢西至小

歛山東面水流入婺源縣界南面水流入
衢州常山縣界迤邐西出饒州樂平縣界
東肢東出休寧縣界至黃土嶺北面水流
入休寧縣界南面水流入衢州常山縣界
又東至白際嶺北面水流入休寧縣界南
面水流入建德路遂安縣界其牛泉嶺又
北引一肢入祈門縣界至大關嶺西南水
流入祈門縣界東北面水流入宣州太平

縣界又轉西南至舉根山東南面水流入
流入祈門縣界西北面水流入池州貴池
縣界又轉東南出至梅鷄山東北面水流
入祈門縣界西北面水流入饒州浮梁縣
迤邐次南入饒州浮梁縣界又魚庭嶺引
出一肢入婺源縣界至梅源山東南面水
流入婺源縣西南面水流入浮梁縣界又
南至濬源山東面水流入婺源縣界南面

水流入饒州浮梁縣界迤邐入饒州樂平
縣界今俱改州按當山肢脉多其于當州
界或從大山界外引肢入諸郡者此皆不
皆載其浮溪水流入曹溪阮溪水流入容
溪二水合流入豐樂水東南流一百七十
二里至郡西合揚之水入建德路下至錢
唐江秋冬涸不勝載春夏勝載又東肢若
嶺高四百五十丈次引東肢入黃檗山高

五百丈大山高一千三百七十丈周回一千餘里

黃山圖經終

跋

嘗閱廬山紀事謂白石菴遭蜀僧改易致不可攷余再三歎息夫以藏書盛典蘇文忠公為之記千古佳話李又涪翁之甥不百年竟同陵谷變遷湮沒無稽豈不惜哉廬紀有魏晉舊裁用是增輝舊文不可漏落使後來痛惜憾事誠山志要道否則難免強作解事之誚此黃山圖經一卷北宋

無名氏著羅鄂州撰新安志猶數引此經
而後人修志俱未得見則是書之不傳久
矣余族伯望子先生游虞山得此於藏書
家猶是宋時槧本上有吳岫家珍印記其
文筆簡古高妙所紀山川形勝源流歸宿
如觀掌上螺紋與俗志有仙凡之別誠足
為山靈重信古書之不可及也彼近志詩
文雖多亦奚以為岫雲方成培仰松甫